



JURNAL
“Funsan no Responsabilidade Institutu ba Defeza Direitu Labarik
(INDDICA, I.P.) Hodi Asegura Direitu Labarik Tuir Artigu 18
Konstituisaun Repúblika Demokrátika Timor-Leste”
Fakuldade Direitu, Universidade da Paz (UNPAZ)



Autor : 1) Adriana Guerra Bere Garcia [Email. adrianabere99@gmail.com](mailto:adrianabere99@gmail.com) 2) Dr. Reinaldo Francisco Luis, Lic. Dir., MD [Email: reinaldofranciscoluis641@gmail.com](mailto:reinaldofranciscoluis641@gmail.com) 3) Honório da C. F. Hornai, Lic. Dir., M.D (75843974)

ABSTRATU

Nu’udar Estadu Direitu demokrátiku ne’ebé maka estabelese sistema jurídiku no polítiku no promove igualdade, Liberdade, justisa no partisipasaun. Hanesan Estadu ne’ebé garantia direitu fundamental katak respeita dignidade umana hodi realiza sosiedade ne’ebé justu, prósperu no solidáriu. Estadu Timor-Leste liu husi tomador desijaun kria lei hodi regula no proteje ema nia direitu, partikularmente regulariza tuir kategoria hanesan sexu, kondisaun defisiénsia, idade, labarik, joven no katuas no ferik. Kuaze nasaun hotu konsidera Labarik nu’udar ajente kontinuator futuru nasaun nian. Labarik sira-nia direitu nu’udar parte ida husi Direitu Umanu no Labarik sira presija hetan protesaun hodi labele sai vítima ba kualker asaun husi indivídu ka grupu iha forma direta tantu indiretamente.

Nune’e mak Timor-Leste fó protesaun espesial ba labarik sira hodi realiza sira-nia direitu, hanesan deskreve iha artigu 18 Konstituisaun RDTL kona-ba Protesaun ba Labarik-oan sira. Esénsia husi artigu ne’e katak labarik sira nu’udar umanu ne’ebé vulnerável, frájlil no dependente ba ema ne’ebé haleu sira, maibé labarik sira sai nu’udar alvu importante ba Estadu hotu iha mundu. Iha parte seluk, labarik sira iha nesesidade diferente ho sira ne’ebé joven no adultu inklui iha nesesidade espesial bazeia ba sira-nia diversidade ka ho kondisaun defisiénsia.

Hodi garantia realizaun labarik sira-nia direitu maka, Governu Konstitusional VIII harii Institutu Defeza ba Direitu Labarik (INDDICA, I.P.), hanesan institutu ne’ebé dedikada ba proteje no promove direitu labarik ho nia jurisdisaun. INDDICA I.P., hala’o misaun abranjente no inklui medida garantia ba labarik hodi moris ho seguru no sira-nia direitu fundamental protejidu no respeitadu, ne’ebé inklui bem-estar no desenvolvimentu saudável ba labarik sira iha sosiedade. INDDICA, I.P., hala’o papel hodi superviziona governu partikularmente Ministériu Solidariedade Sosiál no Inkluzsaun, Ministériu Justisa, Ministériu Saúde no Ministériu Edukasaun Juventude no Desportu relasiona ho implementasaun Planu Asaun Nasional ba Direitu Labarik, hodi haree lejislasaun sira, programa, promosaun no sensibilizasaun kona-ba direitu labarik. Aleinde ne’e halo kooperasaun ho nasaun sira seluk hodi bele fó tulun no tau atensaun máximu ba labarik sira.

Maibé relasiona ho garantia ba implementasaun Direitu Labarik iha Timor-Leste hasoru mós kestaun sira tuir mai:

- 1) La iha armonizasaun husi lei sira hodi define idade labarik ne’ebé presija hodi hetan protesaun
- 2) Seidauk iha Kódigu Labarik ne’ebé sai nu’udar mahon ba lei sira seluk relevansia ba labarik, seidauk iha Lei Traballu Infantil, Lei Edukativu ba Menor, Lei Adopsaun Labarik inklui Lei Justisa Juvenil hodi bele projete labarik sira.

Teoria ne’ebé peskizadór uza hodi deskobre problema iha leten mak Teoria Governu, Teoria Responsabilidade, Teoria Kompeténsia nune’e mós Prinsípiu Legalidade, Konseitu Estadu Direitu, Konseitu Direitu Umanu, Konseitu Labarik no Direitu Labarik. Métopu ne’ebé uja hodi halo peskiza mak métopu peskija normativu hodi identifika no deskreve kona-ba konfliktu

norma no norma mamuk.

Husi problema sira ne'ebé iha, peskizadór deskreve mak “Kompeténsia INDDIC, I.P., hodi fó protesaun ba labarik inklui funsaun no responsabilidade INDDICA hodi asegura direitu labarik iha Timor-Leste, maibé iha kazu ne'e peskizadór konklui katak eziste *konflitu lei* hodi multi-interpretasaun kona-ba labarik ne'ebé maka presija hetan protesaun no *norma mamuk* tan seidauk iha lei espesífiku balun hodi proteje labarik sira.

Liafuan xavi: ***“Kompeténsia, Funsan no Responsabilidade INDDICA, I.P., iha Implementasaun Direitu Labarik”***

1. Introdusaun

Estadu Timor-Leste hatuur nia prinsípiu hodi garantia direitu fundamental umanu katak respeita dignidade umana hodi realiza sosiedade ne'ebé justu, prósperu no solidáriu. Estadu liu husi tomador desijaun kria lei hodi regula no proteje ema nia direitu, partikularmente regulariza tuir kategorizasaun hanesan sexu, kondisaun defisiénsia, idade, labarik, joven no katuas no ferik. Kuaze nasaun hotu konsidera Labarik nu'udar ajente kontinuator futuru nasaun nian. Labarik sira-nia direitu nu'udar parte ida husi Direitu Umanu no Labarik sira presija hetan protesaun hodi labele sai vítima ba kualker asaun husi indivídu ka grupu iha forma direta tantu indiretamente.

Nune'e mak Timor-Leste fó protesaun espesial ba labarik sira hodi realiza sira-nia direitu, hanesan deskreve iha artigu 18 Konstituisaun RDTL kona-ba Protesaun ba Labarik-oan sira:

1. Labarik sira iha direitu ba protesaun espesiál husi família, comunidade, no mós estadu, liuliu hasoru hahalok hotu hanesan abandona, diskriminasaun, violénsia, opresaun, abuzu seksuál no explorasaun.
2. Labarik sira hetan direitu hotu-hotu ne'ebé mundu rekoñese, hanesan direitu sira-ne'ebé hakerek ona iha konvensaun internasionál, ne'ebé estadu aprova no simu ona ka ratifika fila-fila.
3. Labarik hotu-hotu ne'ebé moris iha kazamentu nia laran ka lae, iha direitu hanesan kona-ba protesaun sosiál.

Iha número 1 destaka kona-ba labarik sira-nia direitu fundamental hodi hetan protesaun husi kualker forma abuzu no negligénsia. Hanesan protesaun hodi kontra abandonu, diskriminasaun, violénsia, opresaun, abuzu sexuál no esplorasau. Responsabilidade ne'e mai husi família, comunidade no Estadu. Liga ho número 2 enfatiza ba labarik sira hotu nia direitu universal ne'ebé mundu rekoñese. Aleinde ne'e direitu sira ne'ebé estabelese ka hakerek ona iha tratadu internasionál sira ne'ebé maka Estadu Timor-Leste ratifika no aprova. Signifika katak labarik sira iha direitu iha âmbito nasional no internasionál. Iha número ikus husi artigu Konstituisaun RDTL, reforsa kona-ba labarik sira hotu iha direitu hanesan, tantu labarik sira ne'ebé moris iha kazamentu nia ka lae. Labarik sira hotu presija hetan tratamentu ne'ebé igual no hetan protesaun hanesan iha sosieade.

Atu garantia ba direitu labarik sira iha Timor-Leste maka bazeia mós ba artigu 9, Konstituisaun RDTL, Estadu Timor-Leste ratifika Konvensaun Direitu Labarik iha 17 Setembru 2003. Nune'e maka Estadu iha obrigasaun hodi hakonu direitu labarik sira nian iha Timor-Leste. Wainhira ratifika tiha konvensaun, Governu Timor-Leste iha obrigasaun hodi halo relatóriu periódiku tinan 4 ba Komité Direitu Umanu hodi relata progresu no dezafiu sira. Relatóriu dahuluk relata iha tinan 2007, daruak no datoluk relata iha 2015 no hetan rekomendasaun hodi dezenvolve Planu Asaun Nasional ba Direitu Labarik 2016-2020.

Iha Planu Asaun Nasional ba labarik iha Timor-Leste 2016-2020 ezizi entidade ne'ebé iha papel fundamental koordenasau interministerial no institucional hodi konkretiza direitu labarik nian iha nasaun. Nune'e mak Governu Konstitusional VIII hatuur katak nesesáriu hodi kria Institutu Públiku hodi tau matan ba asuntu labarik sira nian, ne'ebé denominadu Institutu ba Defeza Direitu Labarik (INDDICA, I.P.) tuir Dekretu Lei N.º 4 /2021 27 Janeiro no konsekuentemente revoga Diploma Ministerial n.º 10/2014, 14 Maio kona-bá Komisaun Nasional Direitu Labarik.

Instituto ba Defeza Direitu Labarik (INDDICA, I.P.) nu'udar Instituto Públiku integra iha administrasaun indireta husi Estadu, ho personalidade jurídika, autonomia administrativu no finanseira inklui patrimóniu própriu. INDDICA, I.P., mai ho misaun hodi kontribui ba promosaun, defeza, salvaguarda no akompañamentu ba direitu labarik iha teritóriu Timor-Leste. Promosaun ba direitu labarik bele liu husi kampaña konsientizasaun, edukasaun públika no atividade ne'e engfatiza ba importánsia husi direitu labarik iha sosieade. INDDICA hala'o papel hodi defende direitu labarik, reprejenta labarik sira-nia interese no projete labarik sira husi kualker forma violasaun sira. Liu husi asaun legal sira, polítika públika no advokasia. Foka salvaguarda ba direitu labarik ne'e implika ona medida proteje no garante direitu labarik hetan respeitadu no seguru husi kualker forma explorasaun, abuzu ka negligénsia. Bele liu husi sistema denúnsia no keixa, servisu apoiu ba vítima no polítika prevensaun violénsia hasoru labarik. Iha akompañamentu ba direitu labarik, INDDICA, I.P., hala'o supervizaun hodi hatene situasaun labarik sira iha Timor-Leste. Liu husi, koleta dados no informasaun sira, peskija, relatóriu no avaliasaun hodi garante direitu labarik sira nian realiza ho di'ak.

INDDICA, I.P., hasoru obstákulu internal hodi realiza direitu labarik sira, hanesan Rekursu Umanu, Infraestrutura, Formasaun no Finanseiru. Wainhira iha rekursu profisional ne'ebé kualifikadu no esperiénsia ba asuntu direitu umanu bele garantia kapasidade institutu hodi realiza atividade no program sira ho efikaz no eficiente. Maibé presija segura mós infra-estrutura eskritóriu instituisaun nian hodi apoiu servisu sira. Iha sorin seluk, importante hodi fornese kapasitasaun ba funsióriu sira hodi solusiona kestaun kompleksa relasiona ho direitu labarik. Aleinde ne'e, atu iha rekursu ne'ebé kualifikadu hodi garantia ba advokasia ba lei sira no intervensaun sira ba direitu labarik maka presija iha orsamentu ne'ebé adekuadu.

Aleinde ne'e INDDICA, I.P., hasoru obstákulu external liga ho asuntu lejislasaun. Eziste lei barak ne'ebé maka espesífika mós ba direitu labarik sira nian. Maibé lei ezistente sira la iha armonizasaun ba kategorizasaun idade maka hamosu multi-interpretasaun públiku ne'ebé impaktu ba garantia implementasaun direitu labarik iha Timor-Leste. No lei sira ne'e seidak sai sasukat hodi bele asegura katak labarik sira bele realiza sira-nia direitu ho di'ak. Nune'e maka hakerek na'in konklui katak eziste konflitu lei no norma mamuk hodi responde no asegura labarik sira-nia direitu.

Razaun hakerek na'in hatuur katak iha konflitu ho lei, tan haree ba Lei N.º 6/2023 de 1 de Março kona-ba Lei Protesaun ba Labarik no Joven iha Perigu hamosu kontradiksaun ho lei sira seluk. Hanesan Alinea b) número 1 artigu 4 iha Lei Protesaun ba Labarik no Joven iha perigu define katak labarik mak kualker individu ne'ebé ho idade inferior husi 17. Iha Konvensaun Direitu Labarik nia ámbitu, iha artigu 1 hateten labarik signifika ema ne'ebé tinan 18 mai kraik inklui ida ne'ebé iha inan nia kabun laran maibé fó flexibilidade ba nasaun idal-idak hodi define idade ba labarik tuir nia kontektu rasik. Iha Konstituisaun RDTL la iha artigu espesífiku ne'ebé define idade labarik.

Iha artigu 118 Kódigu Sivíl esplika katak labarik mak ema ne'ebé seidak kompletu tinan 17. Kódigu Sivíl mós esplika katak ema sai hanesan ema boot wainhira halo ona tinan 17 no artigu 1500 Kódigu Sivíl idade mínimu ba kazamentu mak idade tinan 16 ba labarik mane no fetu, ho autorizasaun husi inan-aman, adultu responsável ka funsióriu sivíl ne'ebé rekere ba labarik. Tuir

artigu 20 Kódigu Penál, ema ne'ebé seidaok tinan 16 la bele hetan kastigu husi Tribunál tan konsidera sei labarik ka inkapasidade jurídika. Haree mós artigu 68 husi Lei Traballu ne'ebé define idade menor ba halo servisu mak idade 15, maibé idade entre 13-15 bele halo servisu ne'ebé kamaan. Haree fali iha asuntu saúde nian, tuir Organizaun Mundiál Saúde katak ema ne'ebé ho idade 18 ho kondisaun iha ona oan ka grávida konsidera nu'udar isin-rua ho minoridade.

Razaun seluk, hakerek na'in hatuur katak iha norma mamuk tan problema ne'ebé labarik sira hasoru iha kontektu ne'ebé amplu, nune'e presija mós iha lei espesífiku hodi aseguira sira-nia direitu, hanesan: Lei Traballu Infantil, Lei Adopsaun, Lei Justisa Juvenil, Lei Titular Edukativu ba Menor inklui Kódigu Labarik ne'ebé sai hanesan mahan ba lei sira seluk relasiona ho labarik.

Hanesan INDDICA, I.P., iha papel ba superviziona implementasaun husi governu inklui kolaborasaun ho sociedade sivíl, ajénsia no parte interesada sira. Bazeia ba introdusaun iha leten ne'ebe hakerek na'in mensiona, hakerek na'in halo formulaun problema mak hanesan tuir mai ne'e:

- 1) Saida mak kompeténsia Institutu ba Defeza Direitu Labarik hodi aseguira direitu labarik tuir artigu 18 Konstituisaun RDTL 2002?
- 2) Oinsa funsaun no responsabilidade Institutu ba Defeza Direitu Labarik hodi aseguira direitu labarik tuir artigu 18 Konstituisaun RDTL?

2. Métopu Peskiza

Peskiza ne'e hanesan esforsu husi peskijador hodi prodús resposta sientífiku ba formulaun problema ne'ebé maka hatuur ona. Métopu peskiza ne'ebé utiliza maka peskiza normativa husi Peter Mahmud Marzuki, katak peskiza ne'e hanesan abordajen akadémika ne'ebé konsentra iha náliza no interpretasaun ba norma legal sira inklui lei, regulamentu no dokumentu legal sira ne'ebé relasionadu. Métopu ne'e ajuda fornese kompreensau sólida ba norma legal sira no nia impaktu iha sociedade liu husi esplora kestaun legal sira ho maneira profunda no informadu. Ho métopu ne'ebé peskijador uja sei hatene klean kona-ba monografia ho título: “Funsau no Responsabilidade Institutu ba Defeza Direitu Labarik (INDDICA, I.P.) hodi Aseguira Direitu Labarik tuir Artigu 18 Konstituisaun RDTL”

2.1 Tipu Peskiza

Peskiza ne'ebé halo husi hakerek na'in mak peskiza jurídiku normativu nomeadamente peskiza ne'ebé realiza liu husi análiza lei no regulamentu aplikável ka aplikada iha kestaun jurídika ne'ebé determina ona, aleinde ne'e haree mós iha aspektu sosial nian ka rekolla dados ligadu ho direitu labarik iha Timor-Leste. Peskiza kona-bá “Funsau no Responsabilidade Institutu ba Defeza Direitu Labarik (INDDICA, I.P.) hodi aseguira Direitu Labarik iha Timor-Leste tuir artigun18 Konstituisaun RDTL.

2.2 Tipu Abordazen Jurídiku

Abordajen peskiza katak métopu ka estrutura atividade peskiza ho métopu oi-oin atu rekolla informasaun ho forma deskrisaun no iha signifkadu hodi hetan klareza iha problema ne'ebé identifkadu. Tipu abordajen jurídika mak hanesan tuir mai¹:

¹ Johni Ibrahim, 2007, Teori dan Metodologi Penelitian Hukum Normatif, Cet. III, Bayumedia publishing, Malang, Pj. 300-302

1. **Abordajen Konseitual:** Afasta husi vizaun no doutrina ne'ebé dezenvolve iha siénsia Direitu. Tuir Peter Mahmud abordajen análiza konseitual realiza wainhira peskijador la move husi regra lei ezistente. Ida ne'e hala'o tan la iha regra Direitu ba problema ne'ebé haree ka hasoru iha análiza ne'e;
2. **Abordajen Istória:** Tuir Johnny Ibrahim abordajen ne'e signifika tanba kada regra lejislasaun iha istória diferente. Ho hatene kontextu istóriu, maka halo regra lejislasaun refere, entaun sei iha interpretasaun ne'ebé hanesan kona-bá kestaun legal sira ne'ebé regula husi lei. Abordajen istória permite peskijador entende lei mais profunda sobre sistema ka instituisaun determinadu aranju legal ne'ebé bele minimiza erro, tantu kompreensaun nune'e mós aplikasaun iha instituisaun determinada. Enkuantu abordajen istória tuir Peter Mahmud, realiza iha kuadru hodi trasa istória instituisaun jurídiku husi tempu ba tempu. Abordajen ne'e útil tebes ba peskijador sira hodi entende filozofia Estadu Direitu iha tempu naruk;
3. **Tipu abordajen legal (estatuária):** Nomeadamente investigasaun kona-ba produktu legal sira. Abordajen ne'e haree ba lei relevánsia ba labarik destinadu hodi kompreemde no analiza forma abranjente irarkia lei no regulamentu, prinsípiu lei no regulamentu. Abordajen estatuária ne'e realiza hodi reviza lei no regulamentu sira ne'ebé relasionadu ho kestaun legal sira ne'ebé deskreve ona iha lei inan, konvensaun no lei oan sira seluk. Abordajen ida ne'e sei fó oportunidade ba peskijador hodi aprende sobre iha ka lae armonizasaun entre lei ida ho lei sira seluk;
4. **Tipu Abordajen Komparativu:** Katak tipu peskija ne'ebé kompara diferente regulamentasaun, polítika, prinsípiu jurídiku no sistema jurídiku iha diferente país ka rejiaun hodi entende diferença no semellansa entre lei refere. Objetivu maka fornese kompreensaun ne'ebé di'ak liu hanesan lei ne'ebé aplika iha diferente nasaun no diferente sistema jurídiku ne'ebé afeta protesauun direitu umanu, empoderamentu comunidade no tomada desijaun legal sira. Peskija ne'e bele mós halo liu husi estudu kazu, análiza teórica ka koleta dados empíriu;
5. **Tipu Abordajen Kazu:** katak tipu peskija ne'ebé konsentra iha análiza ba kazu jurídiku konkritu ne'ebé akontese iha prátika ka sistema jurídiku ne'e rasik. Peskijador sei halo análiza husi várius aspektu ba kazu legal, hanesan kazu faktu sira, regulamentu legal sira ne'ebé relevanre no desijaun husi tribunal ka instituisaun envolvida iha rezolusaun kazu. Objetivu husi peskija ne'e maka entende mais profundidade hanesan lei ne'ebé aplika iha kazu determinadu sira no hanesan tribunal ka instituisaun jurídika decide diferente kestaun jurídika. Peskija ne'e bele liu husi análiza documental ka entrevista apenas ho parte envolvida iha prosesu judisial.

Bazeia ba definisaun ne'ebé mensiona iha leten maka hakerek na'in desidi sei uja tipu abordajen jurídiku 2; estatuáriu no konseitual hodi ezamina implementasaun artigu 18 Konstituisaun RDTL kona-ba protesauun labarik.

2.3.Fontes Materia Direitu

Ligadu ho peskiza dia ne'e peskiza nain utiliza mateira direitu normativu hanesan;

1) **Materia Direitu Primária;**

- a) Konstitusaun RDTL;

- b) Konvensaun Direitu Labarik;
- c) Deklarasaun Universal Direitu Umanu;
- d) Kódigu Sivíl Timor-Leste;
- e) Lei N.º 4 /2012 de 21 Fevereiro, Lei Traballu;
- f) Lei N.º 6/2023 de 1 Março, Lei Protesaun ba Labarik no Joven iha Perigu;
- g) Dekretu – Lei N.º 4 /2021 de 27 Janeiro, Harii Institutu ba Defeza Direitu Labarik ;
- h) Diploma Ministerial N.º 3/2022, 9 Fevereiro, Regulamentu Internu Oeganizasaun no Funsionamentu Institutu ba Defeza Direitu Labarik ;
- i) Konvensaun Direitu Ema ho Defisiénsia.

2) Material Direitu Sekundária;

- a) Livru
- b) Disionáriu
- c) Opiniaun akadémika ka artigu
- d) Internet

3) Mateira Direitu Tersíariu

- a) Lejislasaun
- b) Disionáriu
- c) Internet

2.4.Téknika Halibur Materiá Direitu

Tékniku halibur materia Direitu ho objetivu atu halibur materia jurídiku, ne'ebé iha relasiona ho peskiza ida hodi bele hatudu faktu no rejultadu peskija. Nune'e hakerek na'in utiliza tékniku koleta informasaun relevante sira liu husi; estudu dokumentu no internet hodi asesu ba informasaun relevánsia ho asuntu legal sira.²

2.5.Teknika Analiza matéria direitu

Análiza ne'e parte importante hodi haree no entende diretamente kona-ba kestaun ne'ebé hakerek na'in koloka. Dados hotu ne'ebé halibur konsiste husi dados primáriu no sekundáriu sei prosesa no análise. Nune'e maka hakerek na'in utiliza téknika análise deskriptiva kona-ba esplikaun jeral ho dalan maka tuir prinsípiu preferénsia³.

3. Rezultadu Peskiza

3.1. Kompeténsia INDDICA, I.P., halo protesau ba labarik minoridade

Institutu ba Defeza Direitu Labarik ho lian Portugés abreviadamente INDDICA, I.P. (Instituto para a Defesa dos Direitos das Crianças) mai ho misaun hodi kontribui ba promosaun, defeza, salvaguarda no akompañamentu ba direitu labarik iha teritóriu Timor-Leste liu husi garantia ba kriaun lejislasaun, polítika, planu asaun nasional no implementasaun lei inan, konvensaun no lei oan sira ne'ebé iha relasaun ho dezenvolvimentu labarik sira nian.

Relasiona ho protesau ba labarik maka, presija atu hatene labarik ho idade ne'ebé maka presija atu proteje bazeia ba ketgorizasaun idade ne'ebé prevee ona iha lei sira. Maibé iha lei ezistente define diferente kategorizasaun ba idade labarik. Haree ba diferente idade ne'ebé mensiona ona introdusaun, maka presija atu haree fila fali irarkia lei ne'ebé eziste iha Timor-Leste, hanesan tuir mai: Konstituisaun, Konvensaun, Lei órgánika Parlamentu Nasionál, Lei, Dekretu Lei no Dekretu Lejislativu, Rezolusaun Governu no Regulamentu Ministerial sira. Iha konstituisaun la

² Zainuddin Ali, Metode Penelitian Hukum, (Jakarta: Sinar Grafika, 2010), páj. 225

³ Suharsimi Arikunto, Prosedur Penelitian Suatu Praktek. (Jakarta: Rineka Cipta, 1998), páj. 90

define klaru kona-bá idade labarik nian, Konvensaun maske define idade 18 maibé nafatin fó espasu ba kada nasaun ne'ebé ratifika hodi depende ba kontextu no lei sira iha kada nasaun, tuir mai iha Lei Protesaun Labarik no Joven iha perigu nu'udar projetu lei husi Parlamentu Nasional, ne'ebé define labarik maka idade inferior husi 17, maibé iha lei traballu define idade mínima ba servisu maka 15. Ho diferente kategorizasaun idade bele hamosu multi-interpretasaun no implika ba implementasaun asuntu protesau labarik sira iha Timor-Leste. Razaun hirak ne'e maka hakerek na'in define ona katak eziste konflitu lei iha ketegorizasaun ba idade labarik.

3.2. Kompeténsia Governu ba asuntu direitu labarik

INDDICA, I.P., nia servisu sekretariadu divide ba unidade 4: Unidade Monitorizasaun Violasaun Direitu Labarik (UMVDL), Unidade Jurídika no Estratéjia no Análiza (UJEA), Unidade Kampanha Públika (UKP) no Unidade Administrasaun no finansas. Ne'ebé maka hala'o papel monitorizasaun ba implementasaun Planu Asaun Nasional ba Labarik ne'ebé implementa husi Ministériu 4, hanesan tuir mai;

1. **Ministériu Solidariedade Sosiál no Inkluzau:** foka ba asaun hodi bele garante moris di'ak no dezenvolvimentu labarik sira nian liu husi dezenvolve polítika no estratéjia ne'ebé aborda nesesidade labarik sira nian hanesan saúde, edukasaun, protesau no nutrisaun. Ezemplu fornese subsídiu bolsa da mãe ba labarik sira \$15.00 ba inan isin-rua no \$20.00 kada ba labarik sira ho idade 0-3;
2. **Ministério Saúde:** iha kompeténsia hodi garante saúde no moris di'ak labarik sira nian através husi atendimentu públiku no saúde infantile ba labarik sira haú husi pré-natal, pós-natal no tratamentu ba labarik sira ne'ebé moras. Ezemplu: vasina labarik sira hodi prevene husi moras sira;
3. **Ministériu Edukasaun Juventude no Desportu:** iha kompeténsia hodi garante labarik sira-nia edukasaun no dezenvolvimentu. Ezemplu harii eskola sira atu labarik sira bele dezenvolve sira-nia kapasidade intelektual tantu moral no abilidade espesífiku sira;
4. **Ministériu Justisa:** iha kompeténsia hodi garante katak labarik sira hetan justisa, protesau legal no promosaun ambiente jurídiku ne'ebé proteje no promove labarik sira-nia interese, ezemplu dezenvolve esbosu kódigu labarik.

3.3. Kompeténsia fó atendimentu ba labarik

Iha atendimentu ba labarik nune'e mós simu informasaun sira ne'ebé la'o tuir oráriu normal iha funksionamentu INDDICA, I.P., hahú iha tuku 08.00-17.30 loraik ho interupsaun ba almosu tuku 12.00-13.30. Durante periodu ne'e eskritóriu loke no funciona hodi realiza atividade no tarefa regular sira, atendimentu públiku, reuniaun no partikularmente atendimentu hodi simu informasaun no keixa sira relasiona ho violasaun direitu labarik ne'ebé disponível durante oras 24 lora-lora kada semana ho disponibilidade konstante, katak ema bele asesu iha kualker momentu, tantu lora no kalan, durante feriadu no semana ikus.

3.4. Kompeténsia halo relatóriu ba governu

INDDICA, I.P., liu husi UJEA iha papel hodi hala'o monitorizasaun ba implementasaun Planu Asaun Nasional ba Labarik (PANL). Objetivu hodi kontinua avalia progresu realizasaun asaun sira no objetivu ne'ebé hatuur ona iha PANL. Hafoin kompila informasaun sira ne'ebé koleta durante periodu tinan ida relasiona ho implementasaun PANL hodi prodús relatóriu anual ne'ebé inklui

dadus, rejultadu, dezafiu no lisaun aprende.

INDDICA, I.P., liu husi Unidade Jurídika, Estratéjia no Análiza (UJEA) iha responsabilidade fundamental relasiona ho protesau no promosaun direitu labarik, inklui análiza ba programa no estratéjia nasional no setorial ho objetivu hodi garante aliñamentu ho direitu labarik.

UJEA iha kompeténsia hodi suporta elabora relatóriu anual husi rejultadu monitorizasaun implementasaun Planu Asaun Nasional Direitu Labarik, signifika unidade ne'e hala'o tarefa hodi kria relatóriu anual ne'ebé refleta ba akompañamentu no avaliasaun progresu servisu INDDICA, I.P. Iha relatóriu anual ne'ebé prodús husi INDDICA, I.P submete ba Governu liu husi Vise-Primeiru Ministru Asuntu Sosiál.

Iha sorin seluk, UJEA dezempeña papel kolaborativu hodi kontribui mós ba elaborasaun relatóriu periódiku ne'ebé Estadu sei aprejenta kona-ba implementasaun instrumentu ka tratadu internasiona ne'ebé liga ho direitu labarik. Aleinde kona-ba Konvensaun Direitu Labarik iha mós tratadu internasiona relevante sira.

3.4.1. Relatóriu Implementasaun Konvensaun Direitu Labarik ba Komité Direitu Labarik Nasoens Unidas

INDDICA, I.P., liu husi Unidade Jurídika, Estratéjia no Análiza iha kompeténsia hodi kontribui ba elaborasaun relatóriu ofisiál ho regularmente hodi informa ba Komité Direitu Umanu kona-ba implementasaun "Konvensaun Direitu Labarik" inklui protokolu relevante sira liu husi asaun, polítika governu relasiona ho garantia ba labarik sira-nia direitu. Relatóriu refere aborda kona-ba lala'ok kumprimentu obligasaun governu Timor-Leste ba asuntu direitu labarik. Objetivu husi relatóriu ne'e maka permite comunidade internasiona hodi avalia progresu Estadu Timor-Leste iha promosaun no protesau no direitu labarik. Relatóriu periódiku submete ba liu husi Ministériu Negósiu Estranjeiru no Kooperasaun ba órgaun Monitoramentu ONU, hanesan Komité Direitu Labarik, hodi haree informasaun ne'ebé fornese ba nasaun no halo rekomendasaun hodi mellora kumprimentu obligasaun relasiona ho direitu labarik.

3.5. Funsau Institutu ba Defeza Direitu Labarik

INDDICA, I.P., dezempeña funsau importante hodi garantia ba realizasaun direitu labarik sira nian liu husi servisu ativu hodi akompaña labarik sira-nia situasaun iha Timor-Leste. INDDICA, I.P., sei foti asaun imediatu no nesesáriu wainhira akontese violasaun ruma ba labarik sira. Liu husi kolaborasaun servisu ho instituisaun no ajénsia relevánsia sira sei garantia ba labarik sira-nia seguransa no fó assisténsia ba labarik sira tuir sira-nia nesesidade.

3.6. Responsabilidade halo keixa ba órgaun competente

INDDICA, I.P., Unidade Monitorizasaun Violasaun Direitu Labarik abreaviadamente UMVDL sei hala'o papel importante wainhira simu informasaun no keixa relasiona ho violasaun direitu labarik. Wainhira simu tiha informasaun, UMVDL dezempeña papel importante hodi presta apoiu Prezidenti iha prosesu diriji informasaun no keixa sira ba autoridade competente bazeia ba instrusaun ka aprovasaun husi superior inklui rekomendasaun.

Unidade Monitorizasaun Violasaun Direitu Labarik, maka hala'o responsabilidade prinsipál hodi diriji keixa relasiona ho violasaun direitu labarik, ba órgaun competente hanesan; PNTL - Unidade Pessoa Vulnerável (VPU), Ministériu Públiku liu husi Assisténsia Legal ba Feto no Labarik (ALFELA) no Programa Monitorizasaun ba Sistema Justisa (JSMP). No wainhira ko'alia kona-bá

asisténsia akomodasaun ba vítima maka liu husi Ministériu Solidariedade Sosiál ne'ebé haree ba Uma Mahon no Fatin Hakmatek sira.

Iha PNTL liu husi VPU (Vulnerable Person Unit) mak unidade polisia ne'ebe simu keixa husi vítima ka denúnsia husi ema ne'ebé haree krime ho knaar mak hanesan: fó tulun ba vítima no aseguira vítima nia seguransa no vítima nia segredu. Rejista keixa, investiga no halibur evidénsia ba krime. Hato'ó informasaun kona-ba kazu ba Ministériu Públiku (Prokuradór) hodi lori kazu ne'e ba Tribunál.

AIFeLa ho objetivu sei fornese asisténsia legál ba vítima fetu no labarik sira ne'ebé hetan violénsia kona-ba sira nia direitu no oinsá bele lori sira nia kazu ba Polísia no to'ó Tribunál. Akompaña vítima sira ba Polísia, Ministériu Públiku no Tribunál no tuir progresu ba kliente sira-nia kazu iha nível Polísia, Ministériu Públiku no Tribunál. Aleinde ne'e hala'ó esplikasaun ba kliente fetu no labarik sira kona-ba desizaun Tribunál nia iha sira nia kazu.

Programa Monitorizasaun ba Sistema Justisa (JSMP) sei fornese asisténsia legál ba vítima fetu no labarik sira ne'ebé hetan violénsia kona-ba sira nia direitu no oinsá bele lori sira nia kazu ba Polísia no to'ó Tribunál. Akompaña vítima sira ba Polísia, Ministériu Públiku no Tribunál no tuir progresu ba kliente sira-nia kazu iha nivel Polísia, Ministériu Públiku no Tribunál. Esplika ba kliente fetu no labarik sira kona-ba desizaun Tribunál nian iha sira nia kazu.

Aleinde ne'e bele mós relevante ho Ministeriu Solidariedade Sosiál liu husi Rejistu ba kazu, ka ajudus ba suporta seluk no kordena ho Rede Referal sira inklui diriji ba Ospital karik la iha fatin kakmatek ba vítima. Bele refere mós ba Uma Mahon no Fatin Hakmatek ne'ebé eziste.

Uma Mahon nu'udar fatin seguru ba vítima atu hela ba tempu naruk liu, durante kazu prosesa tuir sistema justisa formal. Fó protesasaun emerjensia no hela fatin ba vítima, sira ne'ebé prezisa sai husi uma tanba la seguru. Aleinde fó akomodasaun, fornese mós akonsellamentu ba vítima. Uma Mahon iha Timor-Leste maka hanesan: Uma Mahon Salele – Suai, FOKUPERS – uma mahon iha Dili, Maliana no uma trázitu iha Suai. Uma Paz Baucau Forum Peduli Wanita Oecussi no Casa Vida (labarik sira).

Fatin Hakmatek liu husi Psychosocial Recovery and Development in East Timor (PRADET) hanesan organizasaun ne'ebé halo ezaminasaun médiku forénsiku ba vítima no oferese Fatin Hakmatek hanesan fatin seguru ba vítima. Fó fatin seguru ba vítima iha Fatin Hakmatek ba lora 1 to'ó lora 2. Fó tratamentu médiku emerjensia, halo ezaminasaun médiku forénsiku, no fó akonsellamentu psikolójiku ba vítima sira. Daudaun ne'e, PRADET eziste iha edifísiu iha Dili, Oecusse, Baucau, Suai no Maliana.

3.7. Responsabilidade akompaña vítima iha prosesu sira

Wainhira UMVDL hetan notifikasaun informasaun no keixa kona-ba violasaun direitu labarik UMVDL sei trata ho forma rápida no eficiente bazeia ba prosedimentu internu ne'ebé adota, análiza no elabora dokumentu nesesáriu, konsulta ho Unidade Jurídika, Estratéjika no Análize/UJEA hodi hetan orientasaun espesializada no ideias hodi prosede violasaun refere.

UMVDL servisu hamutuk ho AIFeLa, JSMP no VPU hodi akompaña ka monitoriza kazu refere hodi garante respeitu ba direitu labarik durante prosesu kriminalizasaun sira, ne'ebé inklui garante ba labarik sira-nia asesu ba justis, trata ho dignidade no direitu fundamental hanesan privasidade no seguransa. No mós konvoka reuniaun ho parte ka instituisaun envolvidu sira hodi

garante katak labarik sira hetan assisténsia jurídika, apoiu psiko-sosiál, servisu saúde no reintergrasaun sosial no tipu seluk depende ba nesesidade espesífika husi labarik.

4. Konkluzau

Bazeia ba rejultadu peskija ne'ebé peskijadora halo, nune'e maka peskijadora konklui katak:

1. Hodi asegura intervensaun sira relaciona ho direitu labarik no la'o bazeia ba Planu Asaun Nasional ba Labarik maka Governu estabese Institutu Defeza ba Direitu Labarik iha Timor-Leste nu'udar Institutu Públiku (INDDICA, I.P.) tuir Dekretu Lei N.º 4 /2021 27 Janeiro, funsionamentu dekretu lei ne'e revoga Diploma Ministerial n.º 10/2014, 14 Maio, kona-ba Komisaun Nasional Direitu Labarik. INDDICA, I.P., ho misaun hodi kontribui ba promosaun, defeza, salvaguarda no akompañamentu ba direitu labarik ne'ebé hakerek ona iha ordenamentu jurídiku nasional no instrumentu internasional sira ne'ebé Timor-Leste ratifika, hanesan garantia esensial ba labarik no sira-nia futuru. Maibé Planu Asaun Nasional ba Labarik (PANL) iha periodu 2016-2020, katak PANL nia prazu liu ona, nune'e presija atu dezenvolve no atualiza PANL foun iha periodu implementasaun tuir mai.
2. Institutu Defeza Direitu Labarik liu husi sekretariadu realiza servisu sentral hanesan apoiu tékniku, administrativu no finanseiru. Liu husi unidade 4 hanesan:
 - a) Unidade Monitorizasaun Violasaun Direitu Labarik responsável hodi halo monitorizasaun ba violasaun ba direitu labarik;
 - b) Unidade Jurídika, Estratéjia no Análiza responsável hodi análiza programa no estratejia nasional no sektorial sira iha perspetiva ba integrasaun direitu labarik;
 - c) Unidade Kampana Públika: responsável ba asuntu refere ba kampana pública, atividade diseminasaun informasaun no sensibilizasaun kona-ba direitu labarik;
 - d) Unidade Administrasaun Finansas: responsável ba finansas, lojísitika, aprovizionamentu, rekursu umanu no administrasaun jeral.INDDICA, I.P., liu husi unidade 4 mensionadu sei supervizona garantia direitu labarik sira ne'ebé implementa husi; Ministériu Solidariedade Sosiál no Inkluzau, Ministériu Saúde, Ministériu Edukasaun Juventude no Desportu no Ministériu Justisa.
3. INDDICA, I.P sei hala'o esforsu hamutuk ho Ministériu relevante sira inklui ho ajénsia nasional tantu internasionál no organizasaun sosiedade sivíl sira hodi bele asegura labarik sira-nia direitu liu husi intervensaun programa no advokasia ba tomador desijaun sira hodi kria lei espesífiku sira hodi proteje labarik sira-nia direitu iha Timor-Leste.

BIBLIOGRAFIA

I. Livru

- Abdulkadir Muhammad, 2010, Hukum Perusahaan Indonesia, Citra Aditya
- Absori, 2008, Perlindungan Hukum Hak-Hak Anak Dan Implementasinya Di Indonesia Pada Era Otonomi Daerah, (Surakarta: Fakultas Hukum Universitas Muhammadiyah Surakarta)
- Agung Wahyono & Siti Rahayu, 1993, Tinjauan Tentang Peradilan Anak di Indonesia, Sinar Grafika, Jakarta
- A.V. Dicey, 1987 "Introduction to the study of the Law of the Constitution"
- Bayu Surya Ningrat, Mengenal Ilmu Pemerintahan, 1992,

- Denis Moningga, 2020, Sejarah Hukum Indonesia
- Hans Kelsen (a), 2007, sebagaimana diterjemahkan oleh Somardi, General Theory Of law and State, Teori Umum Hukum dan Negara, Dasar-Dasar Ilmu Hukum Normatif Sebagai Ilmu Hukum Deskriptif Empirik, BEE Media Indonesia, Jakarta.
- Hans Kelsen (b), sebagaimana diterjemahkan oleh Raisul Mutaqien, Teori Hukum Murni Nuansa & Nusa Media, Bandung, 2006.
- HR. Ridwan, 2006, Hukum Administrasi Negara, Raja Grafindo Persada,
- I Dewa Gede Atmadja, Teori Konstitusi, Bandung Desember 2018, pájina 142
- Nikita Rosa, Arti HAM, detikEdu, 2022, Indonesia
- Prof. Dr. I Dewa Gede Atmadja, SH., MS. Teori Konstitusi, Bandung Desember 20
- Reinaldo Francisco Luis, Direitu Konstitusional, Universidade da Paz, pájina 77
- Rira Nuradhawati, 2018, Teori dan Filsafat Ilmu Pemerintahan, Edisi revisi, pájina 52, Bandung
- Thomas Tokan Purekololon, 2020, Negara Hukum dalam Pemikiran Politik, pájina 11, 26, 28, Yogyakarta Indonesia,
- Trisna Wulandari, 2021 Teori dan Pembagian Kekuasaan Menurut John Locke, detikEdu, Indonesia

II. Lei

1. Konstituisaun Republika Demokratika Timor Leste tinan 2002
2. Konvensaun Direitu Labarik;
3. Deklarasaun Universal Direitu Umanu;
4. Kódigu Sivíl Timor-Leste;
5. Lei N.º 4/2012 21 Fevereiro, Lei Traballu;
6. Lei N.º 6/2023 de 1 Março, Lei Protesaun ba Labarik no Joven iha Perigu;
7. Dekretu – Lei N.º 4 /2021 de 27 Janeiro, Harii Institutu ba Defeza Direitu Labarik;
8. Diploma Ministerial N.º 3/2022, 9 Fevereiro, Regulamentu Internu Oeganizasaun no Funsionamentu Institutu ba Defeza Direitu Labarik;
9. Konvensaun Direitu Ema ho Defisiénsia.

III. Dokumentu

1. Planu Asaun Nasional ba Labarik
2. Relatóriu “Labarik sira-nia asesu ba Justisa Formal – JSMP”

IV. Artigu

1. Sistema Governasaun Repúbilika Demokrátika Timor-Leste, <http://timoragora.blogspot.com/2017/05/sistema-governasaun-republika.html>, asesu iha 13 Juñu 2023

V. Internet

1. <https://www.detik.com/edu/detikpedia/d-5695605/teori-dan-pembagian-kekuasaan-menurut-john-locke>
2. <http://abdulkadir.blog.uma.ac.id/2018/01/23/studi-pemerintahan-daerah-dan-pelayanan-publik/>
3. <https://www.detik.com/edu/detikpedia/d-6277271/arti-ham-tidak-dapat-dibagi-ini-penjelasan-lengkapny#:~:text=1.,yang%20sudah%20ada%20sejak%20lahir>

